



Fundasaun Mahein (FM), 20 Dezembru 2019

## Komunikadu Imprensa

### Époka Violênsia ho Medida Prevensaun

Iha periodu sira ferias no selebrasaun loron boot sira, violênsia no asaltu malu iha bairu no dalan públiku ne'ebé liga ho eis Grupu Arte Marsiais (GAM), grupu organizadu no problema sira seluk sai tiha ona époka violênsia ida ne'ebé preokupante tebes iha comunidade. Ezemplu ida ne'ebé Fundasaun Mahein (FM) nota iha tempu ferias sira hanesan Finadu, Natal no Tinan Foun sempre mosu violênsia.

Iha tempu ka hanesan époka violênsia ne'ebé temi liu daudauk ne'e, formas violênsia sira ne'ebé akontese maka entre eis GAM sira, grupu organizadu no asaltu incidental sira. Fator balu ne'ebé sai hanesan kauza ba violênsia iha époka sira ne'e maka problema partikular sira no influencia to'o iha grupu ne'ebé sira koloka-an ba, nomos alkoi no tua.

Polísia Nasional Timor-Leste (PNTL) ne'ebé nia kna'ar lolos hodi antesipa situasaun ne'e dalabarak falla halo identifikasaun no halo atuasaun hafoin violênsia ne'e sai boot tiha ona. Nune'e resposta ba situasaun sira hanesan ne'e sempre depende ba operasaun konjunta entre polísia no militar tuir diretiva husi Governu. Iha fim tinan ida ne'e molok Natal no Tinan Foun Governu hasai tan diretiva hodi halo operasaun konjunta no ida akontese bebeik ona iha tinan sira liu ba. Operasaun konjunta sai tiha ona toman ida ne'ebé hodi solusiona problema ki'ik ka boot ne'ebé akontese iha comunidade. Ida ne'e hamosu presepsaun negativa ba kapasidade PNTL nian tanba la konsege indentifika potencia no fatin risku sira ba violênsia. Nune'e servisu PNTL nian depende ba diretiva Governu ho involvimentu husi militar bainhira aseguira selebrasaun loron boot sira ne'ebé sempre mosu violênsia.

Atu halo prevensaun, polisiamentu komunitariu nu'udar estratejia no aproximasaun PNTL ba prevensaun krime. Tanba ne'e prezensa fizika polísia nian iha comunidade liu husi postu polísia, iha estrada públiku sira, estasionamentu transporte públiku (*terminal*) sira no halo patrullamentu regular iha bairu, aldeia, suku, inklui fatin ne'ebé iha konsentrasaun ema barak tenke sai hanesan alvu ba patrullamentu PNTL nian.

## Rekomendasaun

Susar PNTL atu antisipa akontesementu sira hanesan ne'e, maibe la'os susar atu PNTL haree lisaun hirak liu daudauk ne'e atu halo prevensaun. Presiza haree kazu sira hanesan ne'e liga ho konsentrasaun ema barak iha tempu sira feriadu, violênsia entre eis GAM, grupu organizadu, nune'e PNTL dezenvolve nia estratejia prevensaun. Vizibilidade PNTL nian liu husi funsionamentu servisu polisiamentu komunitariu no kria

koordinasaun maka efetivu liu atu halo prevensaun durante loron feriadu natal no tinan foun.

Atu hetan informasaun kle'an liu kona-bá asuntu ne'e bele kontaktu:

**João Almeida**

Acting Director

Email: [almeidamahein@gmail.com](mailto:almeidamahein@gmail.com)

Telemoveil: (+670) 7756 1184

Website: [www.fundasaunmahein.org](http://www.fundasaunmahein.org)